



KBC/Thuso

Regd.No.19134/88 <http://www.kbc.org.in> NAI/220/99
No. G-4/Regd.Magazine/KBCThuso/MNP-81

Kum 57 Ihinna

Lhatun
April
2021

So503



NUTE

MOPOHNA

MAY EVENTS

Nute Nikho - 9
Pentecost Day - 23
Pastors' Exchange Tour

"Kapa theng, eini pumkhat thi bang a amaho jong
pumkhat ahitheina ding un, Nangman amahohi hong in"

John. 17:11



Secretaries Tour to Gambih 18



Pastors orientation program



- 19/03/2021, KBC No. 13 sunga um Chehjang Church chu KBC hita
- ding'in Rev. Dr. M.Thonghosei Haokip, General Secretary in Pathen
- min in lah lut na anei tan ahi.

• • • • •

CONTENTS

THUMAKAI HO

COUP IN MYANMAR/ <i>Editorial</i>	2
THINGPEL'A THI CHRISTA THOKIT/ <i>Rev Lamkeng Lhouvum</i>	4
THISAN PEHDOHNA/BLOOD DONATION	10
Mission Column/ <i>Rev. Lamkeng Lhouvum</i>	13
Men Column	15
Women Column	18
Youth Column	21
STS Column	22
Holistic Development Column	26
Office Diary	28
KUKI CHRISTIANTE LAH'A AMASAPENHO	30

EDITORIAL BOARD

<i>Chairman</i>	: <i>Rev. Tonglet Haokip, President KBC</i>
<i>Editor</i>	: <i>Dr. M. Thongkhosei Haokip, General Secretary</i>
<i>Joint Editor</i>	: <i>Rev. Onkho Haokip</i>
<i>Contributing Editors</i>	: 1. <i>Rev. Thongkhohun Touthang</i> 2. <i>Rev. Lamkeng Lhouvum</i> 3. <i>Rev. Tongmang Haokip</i> 4. <i>Ms Tingneihing Kipgen</i> 5. <i>Rev. Lunkhosei Tuboi</i> 6. <i>Rev. T. Thangkhosei Haokip</i>
<i>Design & Layout</i>	– <i>Pu S. Lenboi Haokip</i>
<i>Circular Manager</i>	– <i>Pi Vahboi Baite</i>
<i>Recorder</i>	– <i>Ms. Nemhoichong Haokip</i>

THUSO LAHMAN

Church/Organisation/ DepartmentRs. 300/-
Individual Rs. 200/- (Post a Rs. 250/-)

Indian Overseas Bank, Imphal Branch
A/c No. 073201000000350 IFSC No. IOBA0000732

The General Secretary,
Kuki Baptist Convention,
Opp. DM College, Imphal 795001, Manipur
email: kbcindia@rediffmail.com

Advertisement bolnom hon Mobile No. 70895979446 Contact thei.
Circulation to kisai lam Mobile No. 9862107393 bol ding.

Editorial...

“KAWLGAM SEPAI HON HUNAMA VAIHOMNA NEI (MILITARY COUP IN MYANMAR)”

(Gen.37:19)

Editorial

*“Vo mitin vaipi, phat tin nitinin Pathena kingaiyun; Pathen angunga chun nalungthimu twi kisunglha bangin peuvin; Eiho dinga Pathen bou kiselna ahi.”
Psalms 62:8.*

Achesa nisim 1 February 2021 nikho chun Kawlgam Sepai (Myanmar Military Coup) hon mipi deilhenna a kivaipohna chu hunamin ana lahpeh tauvin ahi. Hiche nia pat chun mi asang aja hon hiche sepia vaihomna deilouna jeh chun lamlen a kijotna aneyun ahileh sepaihon lungsetna le hepina beihelin avouvin, meithalin akap un, tuni geiya thihi 130 val ahitai tin WhatsApp le thuso dang danga konin akija jing tan aphamo lseh jengin ahi. Sepai vaipohon thuso miho jeng jong aphyallou jallun ichan gei hitam ti kicheh tah a he jong umlouvin akihen, amavang mihon amuu le ajah sanguva khoh jo dingin vang ginchat aumlleh jenge.

WhatsApp a kimuhon Federal Army akisem-doh thu jong aseiyun, hiho chu tuchana

thingnoimi group ho ahiuve atiuve. Chuleh, aseibe nauvah tutua Kawlgam Sepai hohi mithat/mikichatsahho (terrorist) kiloikhomna ahiuve tia kiphongdoh in jong akiseiyin ahi. Hiche Kawlgam sepai hiya akiphinho kap ding deilou mi 100 valjen Mizoram gamsunga ahung lhailut un, Assam Rifles ho khut a um-sese India government le Myanmar Military kihettona le amaho ngehna dungjuiyin anung solpeh un ahi ti akijae. Hitia anung solpeh houhi Sepai Vaihom hon Court Martial abol diu ham athadoh jeng diu ham ti hi ginchat ahitai. Tuhin Bank ho akihong tapon, mipihi neh ding kichoh thei louva hahsa tah ahitauvin, hospital hoa mijen doctor le nurse hon jong hiche lunglhai louna kijot na a apangun, mi akitongkhaho jen ding jeng jong aumpouve akitie. Christian ihinau leh houbung ihinauva ibol-theiyu aumpon, Pathen henga taona a igeldoh uva, Pathenin lenggam atuna chule abung butun thei ahi ti tahsan pumin ana taopeh u hite:-

- Tulai boina le hahsatna ahung bei theiya, Chamna le mipi kivaihomna anung um kit thei na ding
- Mipihon neh-le-chah akimu theiyuva anatoh-na cheh uva lungmonga akile thei kit nadingu;
- Vannoiya vaipohon jong sepai vaihomho at-hunun uva boina hi akisuh thip theina ding;
- Agam sunga cheng jouse kibang tah a ven-bitna (protection) amucheh nadiu;
- Hitobang thilsoh hoa kona Pathen natoh le aloupina akiphondoh thei na ding

Lungluttah a simho le taoho jouse chungu Pa-then vangbohna chang cheh tauhen.

Rev Lamkeng Lhouvum
Secretary, Mission & Secretary KBC

THINGPEL'A THI CHRISTA THOKITNA

Sermon

Chrisat Thingpel'a athi jengseh hilouva thina akon athodoh thuhil jong loupitah thuhil ahi. Christa thina chan het'a athokitna thu het-lou ding hi tahsan kibulphuna'a abukim thei lou khat ahi. Christa thokitna chung chang jouse hetchen'a thokit Jesu toh hinkho mankhom ding deisahna jeh'a hiche bung hi hung kijih doh ahi.

Christa thokitna thubul

Jesu Christa thingpel'a akikhetbeh'a athi jou chun lhan ngah ding anakikoi in melmate chu bolkha kisaten in nomtah in aum gam tauve. Hapta sung'a nikho masa ni jingkah matah in Thingpel chung'a Jesu kikhaipet'a ling kihot tobang chun ling akihot in vantil ahungkum lhan kot'ah ading tai (Matt. 28:2). Vantil in lhan kisinna song lentah chu akhut in atham in ahileh songchang neocha kitham bang in akitangdoh tai. Hichun lhan ngah'a pang sepaiho chu atijabehseh un athimil gam tauve. Lhan ngahho ahung lip doh jou un

vantil le Jesu ana um tapoi. Thilsoh umchan chu vaipoho ang sung alhut pai tauve. Vaipoho chun hiche thutah chu mipi in ahedoh khah leh mipi in themgao dihtah khat that ahiuchu ahin hetdoh uva ama chung gih ding ahijeh chun akihoutoh un sepai lhan ngahho chu sumguch apeuvin, "ka ihmud lan kah un seijuihon ahung gumang tauve," atisah un ahi (Matt. 28:11-13).

Nikho phabep masang chu hiche miho chun Jesu matna ding in Judas chu sum anapeuvin ahi. Tun amaho mama chun Jesu thokit seldohna ding in sum ape kit tauvin ahi. Sum chu ha leu ten ding dan ahivu. Thutah chu selmang tei tei ding anati vang un akisel theipoi. Jesu chu mun tamtah le mi tamtah heng'a immang theilouhel in akilah jing tan ahi. Mihem in thutah sel

mang thei dan'a akikigel ji vang in akiselmang theipoi. Ajeh chu Pathen chu nelpeh hoi ahipoi.

Hapta kipat ni masani in numei phabep in Jesu long chu thaonu peh ding in ahung uve. Jesu hi nigup nilhah'a kivuipan ahin hapta kit ni masani jingkah matah'a thoudoh ahitai. Hiche thu hi themgao thusei guilhunna ding'a uma ahi (Matt. 12:40; Hos. 6:2). Jesu chu Sabbath nikho kichaiya thoudoh ahi. Nikho gup nikhoa hi imajouse ajothengset'a nikho sagi (Sabbath) nikhoa hi kicholdo ahitai. Ama nikho masa nin athoudoh in hiche nikhoa pat hin hapta sung'a nikhoho lah'a ni masani (Pakai ni) hi akiha minphah pen le Lhagao thua kiha manchah pen in ahung pang in ahileh Christian ten jong imang jing tauvin ahi.

Christa thodoh photchenna

Mary Magdalene chu jingkah khovah thenthen'a lhan lam'a ache chun lhan kihon chu amun, asung'a lut pailouvin anunglhai jel in seijui John le Peter kom'a agalhut tai (Jn. 20:2). Mary Magdalene chejou chun Jesu nu Mary, Salome le Joanna lhan mun alhung uve. Amaho chun Jesu long'a nu ding thao twi jong achoi un ahi. Lhan alhun masang uchun thao nu ding ahijeh uchun lhan kisinna song chu koi in eitahdoh peh ding'u ham tin akidongto un ahi (Mk

16:3). Amaho amun alhun un lhan akihongsa aum chu agamu tauvin alungdong lhez tauve. Amahon lhan sung chu aveuvin ahile mi khat ponbang'a kivon khat Jesu lupna jetlam'a ana um in ama chun, 'tija hih un Nazareth Jesu chu athoudoh tan, tun Ama hikom mun'a aumtapoi,' ati (Mk. 16:6).

Mary Magdalene in Peter le John kom'a agasei chun amani jong lhanlam'a ache lhon'e. John chu khangthah jep ahijeh chun alhai hat jep in Peter chu akhel tan in ahi. John in lhan kot akon in lhansung aven Peter alhun phat in lhansung'a alut in, Jesu kivonna tupat ponnemho chu amun ahi. Aban in John amatah jong asunglhan ahi (Jn. 20:3). John le Peter chun thilsoh umchan chu Jesu nungjuiho ahilouleh melmaho thilbol ahilou ding aphochen lhon tan akinungle lhon tai. Amani akinungle jou lhon in Mary Magdalene chu lhan ahung lhung kit tai.

Magdalene lhan achun achen ahileh pon bangleh'a kivon vantil ni amun ahi. Hiche vantil chu numei masaho kom'a thusei chu ahin Peter le John chu ana kimusah lou ahi. Vantil khat chu alulang'a khat chu akengto lang'a aumlhon in ahi. Mary hatah'a aka chun, "Numei ibol'a na ka ham? ti'n O aging in ahi. "Ka Pakai agumang tauvin keiman aumna ka hepoi," "ipi na hol

ham," ti'n adonbut in ahi. Chujouvin Mary in keng kho gin ajan akinung hei leh Jesu amatah in thudoh ahindong kit in ahi. Mary chun, 'ka pu na pohdoh khah leh nei seipeh in,' ti'n atao in ahi. Jesu in Mary ahinkou chun, "Mary chun Jesu O chu ana hetai," Jesu in ka kelngoi in ka O ahe'e tia ana sei chu adih ngei'e (Jn. 10:27-28). Mary in Jesu chu atham gotleh Jesu anom poi (Jn. 20:7).

Lhankhuh'a Mary Magdalene heng'a akilah in ahi (John 20:10-18; Mark 16:9-11). Numei ho lhanna acheuva vantil'in Jesu Christa athoudoh tai ti'a aseipeh jou uva ahung kileu chun Jesu Christa chu aheng uvah ahung kilah in ahi (Matt.28:1-10). Solchah Peter heng'a jong athodoh jou nilhah lam'in akilah in ahin ipi phatsung ham vang akisei poi (Luke 24:34; 1 Cor. 15:5). Cleopas le Emmaus lampi'a seijui dang khat heng'a akilah in ahi (Mark 16:12-13; Luke 24:13-35). Solchah som (Thomas jaolou) le seijui dangho, (koikoi hiuva ham kiseilou) heng'a akilah in, hiche hi nilhah an nehding'a akikhop khom pet'u ahi (Mark 16:14-18; Luke 24:26-40; John 20:19-23; 1 Cor. 15:5).

Jesu Christa athodoh jou hapta khat jouvin Solchah some khat (Thomas jaonan) aheng uvah akilah in ahi (John 20:26-28). Galilee dillen'a seijui sagi ngaman'a aum pet un akilah in ahi (John 21:1- 23). Galilee molchung'a

seijuiho heng'a akilah in ahi (Matt. 28:16-20). Seijui mi janga heng'ah khatvei jin akilah in ahi (1Cor. 15:6). James heng'a akilah in ahin aphot le amun akisei pon ahi (1 Cor. 15:7). Solchah jouse heng'a akilah in (I Cor. 15:7). Van'a akaltou ding in Olive mol chung'a Solchahho heng'a akilah in ahi (Mark 16:19; Luke 24:50-52; Acts 1:3-8). Stephen heng'a (Acts 7:56) Solchah Paul heng'a akilah in ahi (1 Cor.15:8; Acts 9: 1-9).

Jesu chu Thingpel'a chun athi mong'e ti chu photchenna um ahi. Rome sepaiho chu mitha themtah ahiuvin, Jesu jong ana thau ahi. Hiche jeh chun Jesu chu amaho khut akon hingdoh lou ahi. Hiche chungchon'a non-Christian thusim them Tacitus le Josephus injong Jesu chu athimong'e tia ana phondoh lhon ahi. Kipana Thupha lekhabu liho tailouvin Corinth Thot Khatna bung som-le-nga na ajong Jesu chu eiho chonset jeh'a thi a nithum lhin nikhoa thoudoh kit ahidan ase in ahi.

Jesu kivuina lhankhuh chu nithum lhin nikhoa chu akeova ana um ahi. Hiche lhankhuh akeova um chun Jesu thodoh aphotchen ahi. Matthew, Mark, Luke, le John lekhabuho in Jesu Thingpel'a athi le athodoh kit ajih cheh uhi amittah a muchen-ho thu asutnau ahitoh lhon in Jesu thodoh hi amuchenset aume ti photchen ahi. Corinth Thot Khatna bung som-le-nga

na a Paul in Jesu thodoh mimal le mi tamtah tah angsung'a akilah ase i hin hettosah mi aume ti photchen ahi. Jesu thi le thodoh jouva atahsanho in houbung aphudoh uva vannoi pumpi alosoh hi Jesu thi le thodoh photchenna ahi.

Christa thodoh hinkho mukhaho hinkho

Jesu in Mary chu seijuiho kom'a thulhut ding in asol tai. Jesu thodoh thupha sei ding'a Jesu in anganse masatpen hi numeite ahiuve. Mary chu mite kom'a achen, "keiman Pakai ka mudoh tai," ti'n asam phongle tan ahi. Hiche thucheng hi Christiane thupoh khat ahi. Ajeh chu Christa mukha lou chu Christian ahithepoi. Christian kithiho hi Christa chungchang hetna jengseh hilouva, Chirsta toh kimutona chu ahi. Alangkhat'a sei ding in Jesu chu ahing mong mong'e ti photchenna nei ding ahi. Lhan kisinna chu tonsot'a ding'a kihongdoh ahitai.

Jesu athodoh jouva akilahna miho chu ama ngailu cha cha bou ana hitauve. Jesu to ikimutoh khah tah em? Ole na sei mai mai ham? Jesu eiho heng'a kilah khalou ham? Jesu chu lhan akon athodoh jouchun angailut ahilouleh ama angailuho kom bouvin akilah jing tai. Emmaus kho jon'a che teni kom'a ana kilah'e. Thomas kom'a ana kilah'e. Peter kom'a ana kilah'e. Mary chu thok-

itna thu pole ding'a kisol ahin Christa thokit ahethahjeh chun kipa thanom pum in hinkho amang tai. "Ama athoutai," kitihi Christa chun chonset gal ajoutai chule anungjuiho adih tauve tia kiphondona ahi.

Christopher Columbus chun America ana mu hihleh ipiti ding? Adolf Hitler chun England ana la hih leh ipiti ding? Martin Luther chun ama khang laiya hou dihloho chu ana suhdihda leh ipiti ding? Hiche bang chun Christa thodoh lou hileh ipi atita dem? Kipana Thupha kisamphong hi mohseh hiding ahi. Christian ka hi tiho jouse jong chonsetna um nalai ding'u ahi. Ana thina tahsanho jouse jong damun'a umden ding'u ahi. Mihem ding'a hinlo umlou ding khonung'a hinkho kinepna umlou ding ahi. Huhhingpu Christa jong mom mang ding ahitai. Christa jal'a ithoh gentheinou jouse panna bei hiding ahitai. Kipana thupha lhangsap chule seijuiho jong mijou jeng hiding'u ahi.

Christa tahsa tah'a athodoh thuhil loupina

Jesu Christa Thokitna kiti hi gaouthu kisei guilhunna ahi (Ps. 16; Is 53; Dan 7). Hiche gaouthu kisei hi Kipana Thupha lekhabuhoa aguilhunna akimun, Lekhathot lekhabuhoa akihilchen in chule Thuphon lekhabua akigom khom in ahi. Hiche thokitna hi

ana um lou hile, Christa thuhilho adihlou hijeng ding ahitai. Michonsete sochatna thu hi Christa thina le thodohna'a kingam ahi. Christiante tahsan bulphuna hi Christa thodohna'a kingam ahi (I Cor. 15:14, 17). Hiche Thokitna thu hi tahsan louho ding'a kupalna ahi. Pakai Anjon kibol hi Christa thodohna umlouva panna bei ahi. Christa Thokitna umlouvin kinepna aumpoi (I Cor 15:19), Lhangsap ding thu aumpoi (I Cor. 15:14) chule chonset akithoidam poi (I Cor. 15:17). Christa thoudoh lou hile Kitepna Thah hi thutah umlouva lekhabu hiding ahi.

Ama tahsa mong mong thoudoh ahi. Miho chun Ama tahsa mong mong ahi chu amuchen un ahi (Jn 20: 15-18). Ama tahsa chung'a chun amaha aumden in ahi (Jn 20:25-29). Ama chu thamkhah theiyin aume (Jn 20:27; Matt. 28:9). Loupina Tahsa ahi. Athi masang'a kimulou akimudoh'e. Ama chu chele vale aboi tapon anop na na'ah akilah tan ahi (Lk 24:36; Jn. 20:19). Kipana thupha kisei hi adih ahi. Thina gal akijoutai. Chonset gal akijou tai. Danthu akijoutai. Lhan thaneina akijoutai. Amatoh thingpel'a kikhethbeh tha ihitauve (Gal. 2:12).

Christa chu tasa tah'a thoudoh ahi (Lk. 24:39). Christa chu loupina tipum'a thoudoh ahi (1 Cor.15:44). Christa chu mon theilou ding'a kithou ahi (Rome.

6:9). Christa chu Pathen thahat in akaithou ahi (Acts 2:24). Christa chu Ama thahatna'a thoudoh ahi (Jn. 10:17-18). Christa chu Lhagaotheng thahatna akon thoudoh ahi (1 Pet. 3:18).

Jesu thodoh hin Pathen Chapa ahina aphonhdoh'e - Aman ahinkho chu lahdohna jong nung koi kitna jong akhut'a umin ana seiyin ahi (Jn 10:17-18). Jesu thodoh hin Pathen thu hi adih dan aphonhdoh'e - Thulhun Lui le Jesu thuhil hon Jesu chu thoudoh kit mong ding in ana hil un ahi (Ps. 15:10; 110:1). Thoudoh lou hile Pathen thu hi dihlou ding ahitai. Jesu Thodoh hin mithengte jong thoudoh kit ding ahidan aphonhdoh'e - Jesu athodoh lim bang'a ithodoh uva amabang ihung hidiu ahiye (I Thess. 4:13f).

Christa thodoh patchomnaho 01. Athi kit talou ding Huhhingpu -"Ajuh chu athilah akon'a kikaithou Christa chu a-imatih chan'a thi lou ding ahi; thina in achung'ah thu anei tapoi, ti iheuve," Romans 6:9

02. Lungheina -"Ipu ipateu Pathenin nanghon thinga nakhai uva nathasau Jesu chu akaithouvin, Israelte achonset chengseu ngaidam'a aumna dia chonset lung heina apehna din ama chu Pathenin ama jetlam'a vaipo le huhhingpan achoisangtai." Acts 5:30-31

03. Kinepna Thah- I-Pakaiyu

Jesu Christa Pa, ahapina bulhin dungjuiya thina'a kon'a Jesu Christa thodoh jal'a hing jing kinepna'a eihing thah kit'uva Pathen chu nun nom hen," 1 Peter 1:3

04. Chonset Ngaidamna-"Chutia Christa kaithouva aum loule na tahsan'u jong phachom lou, tugeiya na chonset chengseuva um jing nalai nahiuve." 1 Corinthians 15:17

05. Lhagao Theng -"Hiche Jesu hi Pahtenin akaithoutai, keiho chengse hi ahettosah kahiuve. Ama chu Pahten jetlam'a choisingin aumtan, Pa'a kon'a thutep Lhagao Theng agalah chu ahin bung lhan, nang hon namu uva najah-u hi ahi." Acts 2:2-33

06. Tahsan Chate Sapset Chang talou ding -"Themmo chansah'a koi ham? Athia, achungchon cheh'a athilah'a kon'a kaithouva um Chirista chu ahi; Ama Pathen jet lam'a atouvin eiho ding in eitaopeh jinguve." Romans 8:34

07. Jesu umpina le venbitna -"Veuvin, keiman vannoi leiset kichai ni geiyin ka umpi jing nauve," Matthew 28:20.

08. Thutan hung ding photchen-na -"Ipijeh-inem itileh aman amilhendohpa amanchah'a thudih'a vannoi leiset hi thu atanna ding'a nikho khat atepsa ahitan, hiche hi tahsan din amilhendohpa chu thina'a konin akaithoutai," Acts 17:31

09. Khonung'a Pathen lung-hanna akon huhdohna-"Chule ahung lhung tei ding lunganna'a kon'a eihuhdoh-uva Jesu thina'a kon'a kaithouva umpa, Achapa van'a kon'a hung dingpa na-nga jiu chu aseiyu ahi." 1 Thessalonians 1:10

10. Eiho thina kon thokitna -"Ajeh chu athi lim bang'a ithiuva amatoh kijotmat ihuive, athokit lim bang'a jong ithokit ding'u ahi," Romans 6:5

Christa thodoh le Christiane hinkho

Christa thokitna tahsan'a chule hechen mihem chu hinkhoa alampi kikhel ding ahi. Vetsahna in, Emmaus kho jon' che teni chu achaina in alampi lhon le alunggel lhon ana khel lhon tan ahi (Lk. 24). Christa thokitna hinkho hi midang jong seipeh ding ahi. Seijui masa, thokitna mukhaho, Martyr achang ngam cheh uvin ahi. Amaho chu vannoi leiset kichai nikho gei'a Pakai in aumpi ding ahuive. Amaho umna jouse'a Christa in avil jing ding'u ahitai. Na boina, na kana, na deichatna mun jousea Aman na vil ding ahi. Christa thi lim bang'a ithiuva ahileh ama thokit lim bang'a ithokit ding'u ahi. Vannoiya hou/sakho jouse sang'a Christian hou kikhehna pen khat chu Thokitna hi ahi.

THISAN PEHDOHNA BLOOD DONATION



Article

NA THISAN PHAL IN

Tijatna ding aumpoi.

Hasa lou tah ahi.

Mihem hinkho huhdohna ahi.

Midang khat hindohna ding in panla'n

1. Ipi ding'a Thisan peh ding ham?

Thisan khel'a man thei ding leisetna thildang aumpoi. Thisan hi hoilai mun hijongleh ipi thepna ki mangcha jongleh kistem thei lou ahi. Thisan hi mun kitup tah khat a nikho 35 sung bou kikoitup thei ahin hiche joukalse chu thisan chu kimang thei jilou ahitai. Hiche chung chon in Thisan kitih nitin'a mihemte ahideh'a dammo veise le thiding dinmun'a umho in angai-chat khohpentah'u khat chu ahijing in ahi. Mihem khat in thisan ahinphaldoh hi Hospital mun'a Operation kibolho, nao neiho, Accident tohho, Cancer neiho le natna jatchom chom neiya thisan lhasamho huhdohna ding'a pang ahi. Koi macha in itih tengleh chule hoilai mun'a thisan angaichat ding ham tihi akisei theipoi. Gam sung'a japi/kiloikhomna khat in aphant phat chaa thisan apeh/phal doh jiu hi mipi kihinsona ding'a lampi umpen khat ahi.

2. Ipi ding'a changval (Voluntary) a thisan peh/doh ngai ham?

Muntin gamtin'a thisan kijoh le kimuhohi sum le pai lut a kila ahivang in athengset atampon, midang pehson ding'a tijat umtah ahiji. Chujeh in eima changval kipehdohna jal'a Hospital a thisan peh hi ngailutna vetsahna le kipedohna lentah chule thisan thengset kimuna thei sun chu ahi.

3. Thisan peh akon natna kikilah doh thei em?

Thisan peh akon natna HIV jaona jat chom chom akiladoh thei poi. Ajeh chu thisan lahna kimang cha jouse hi abon'a natna emacha umlouna ding a kisuthengsa (sterile) ahi.

4. Koitabangho chun thisan apeh thei ding ham?

Thisan hi mijousen apeh thei poi. Thisan pethei hi tahsa damthei ahitei angaiyin ahi. Thisan pethei chu tahsa kum 18 apan kum 65 sung mi hiding, tahsa gihdan (weight) 45 Kg chunglam hiding, chule

Hemoglobin (thisan level) 12.5 gms/hundred ml apat chunglam hithei ding ahi.

5. Mihem tahsa a thisan ijat um ham?

Pasal tahsa sung'a thisan um hi tahsa gihdan (weight) Kg 1 chung'a thisan 76 ml ahi, chule numei tahsa gihdan (weight) Kg 1 chung'a thisan 66 ml um ahi. Numei hihen pasal hijong le tahsa gihdan (weight) Kg 1 chung a thisan ngaichat hi 50 ml ahi (pasal thisan 26 ml chule numei thisan 20 ml hi tahsa weight Kg 1 chung a kon aval/surplus a um ahi).

6. Mikhat in thisan ejat apehdoh thei ding ham?

Tahsa gihdan (weight) Kg 1 chung akon thisan 8 ml akipedoh thei in ahi. Mikhat a kon Thisan hi 350 ml bou kila ding ahi, hichu tahsa sung'a thisan umjat lah'a themchap bou ahi.

7. Thisan kipedoh hi nikho ijat sung'a kithah sem kit ding ahi?

Thisan (a twi/liquid) kipedoh

hi nikho 2 sung'a akila doh jat chu tahsa sung'a dimkit ahitai, chule tahsa Thisan ahina (cellular component) hi nikho 21 sung'a pilingset kit ji ahi tai.

8. Thisan peho ding'a neh le chah lou le ai epi angaicha um em?

Thisan akipeh jou teng Special neh le chah (diet) lou le ai (medicine), kicholdo (rest) emacha angaicha poi. Thisan pehjou nidan kehkhath (after 30 minutes of blood donation) jou teng angaina bang'a toh le tham bolthei ahitai.

9. Thisan hi nikho ijat jouteng le peh kit thei ding ham?

Thisan pesa mi khat chun nikho 90 (ahilouleh lha 3 jou) teng avel'a apehkit thei ding ahi. Tahsa kum 18 to kum 65 kah sung miho hin ahinkho sung'a thisan 188 vei apeh thei ding ahi.

10. Mihem khat in thisan apehdoh jouva tahsa sung'a thisan chu nikho 21 sung'a kithahsendoh jou ahileh ipi ding'a lha thum

jouva bou thisan kipe kit thei ham?

Thisan pedohpa/nu tahsa atumbhe'a ahatjoh chehna ding'a kibol ahi.

11. Thisan peho bol ding ipi ham?

Thisan pehdoh masang'a thisan pehdoh chung chang phatea hetchil ding ahi. Thisan pehdoh jou tengleh Blood Donors Card kilah ding, Thisan peh kitna ding phat kihetdoh ding thisan pea iche tengleh Donors Card kipoh jing ding, midangho jong thisan pedoh ding'a tilkhou ding, Licensed nei Blood Bank bouva thisan peh ding chule lah ding, Blood Bank akon thisan lah ding dan het them ding ahi.

12. Thisan kilah ding tengleh ipi pi vet (Test) ngai ham?

Thisan pedingho hi alouthei louva anoia umho hi test bol tei tei ngai ahi.

--HIV, Hep B, Hep C, Malaria, Syphilis (tithah)

13. Thisan pehdoh jou tengleh mi kimkhat alhasam jie, hiche hi mi jouse

chung'a um ham?

Thisan pedohho mi themcha hi alung avai jie, hichehi thildang jeh hilouvin ama kigel dan'a thisan apehdoh jeh'a lungthim tijatna (Psychological Effect) le thisan apehna mun'a kon gangchel/kin tah'a dingdoh tiho jeh ahin, thisan pea na pan leh tijatna nei hih in chule kintah'a dingdoh loi louvin ol tah in ding doh in imcha dang aboi ding aumpoi.

Thisan pe inlang hinkho huhdoh in.

63 FOUNDATION DAY

KUKI BAPTIST CONVENTION



63rd KBC Foundation Day chu achesa Nisim 16 March 2021 nin KBC Office mun na Pu Zamlal Zou Vice President KBC in Flag khaidoh na aneijin chule Rev Lensei Kipgen, Retd. Pastor, KBC, Speaker hinar nom tah le lolhing tah in kin ana kibollin ahi

Mission Column

Rev. Lamkeng Lhouvum

1. Missionary Lhingpineng @ Sherlyn Khongsai kithah doh ta.

Nisim 1/3/2021 nikho hin, Ng. Lhingpineng @ Sherlyn Khongsai Missionary nu chu Missionary Teacher khat din, Joujangteke mun a akithah tan ahi.

2. Faith Academy Joujangteke Sports Meet

Nisim 3/3/2021 nikho hin Mission Board Chairman Pu S Athang Haokip, Pu Haojakam Dounghel chuleh Rev Lamkeng Lhouvum, ama ho Cheng hi Faith Academy Joujangteke School a Sports meet a opening ceremony a Rev Lamkeng Lhouvum Chief Guest in apangin, Pu S Athang Haokip, Guest of honour apang lhonin ahi.

Hiche toh kilhon chun Elijah Prayer Mount Gothol mun vil lhah na jong akineijin ahi.

3. MISSIONARY CARE TRAINING

Nisim 4-5/3/2021 Nikho hin MBC Mission tohgon na boita Missionary care Training, Pastoral Training Centre mun Litan Sareikhong mun'a Pu Neka Vaiphei, Mission Board member Pu toh akipangin ahi. Hiche sunga kiseipen chu Missionary ho itih gelkhoh ding ham ti ahi.

4. KBC MISSION SUNDAY Houbung chom chom a kimangta.

Nisim 5-6/3/2021 Mission Sunday, KBC Houbung jouse a ana kimangin ahi. Hiche nikho hin Houbung houses Speaker arrange ana kibol joupon hijong Houbung ho jousen kipa tah in umang soh keijun kipa thu sang tah in kahin phongin ahi.

KBC Mission Sunday nikhoa mun chom chom a Speaker a che ho jouse tohkhom pi Pakai lhacha ho chung a kipa thu kahin phonge

5. Prayer day cum One day Seminar lolhing tah a kimangta

Achesa nisim 10/3/2021 nikho chun KBC Chepal hall mun a Indian Orphanage Mission hotoh Kin loupi tah akimang khom tan hiche nikho hin Missionary ho taokhom na leh IOM ho a kona resources Person chom chom ahung pangin ahi. Rev Dr M. Thongkhosei Haokip Lemna thu aseijin chuleh Mission natoh machal ding thu akisei khomun ahi.

6. Mission support Houbung thah vilna

Nisim 17th March 2021 nilah in KBC Mission Board member Pu Neka Vaiphei, Pu Lienboi Singsit jaona in Mongpijang Baptist Church KBC

No 4 vilna akineijin ahi. Mongpijang Baptist Church hi Tukum 2021 a patna Mission share kipe Chung chona Mission support Lhakhatna Rs. 7000/ din ahung pang taovin ahi. Pathen in phat thei boh jing tao hen

8. Mission Support Houbung Thah (Tuilelon B/C) vilna

Nisim 19-20 March 2021 nikho Saturday le Sunday nikho hin Tuilelon Baptist Church KBC No12 Houbung vilna akineitan ahi. Tuilelon Houbung hi Mission Share akipeh nao Chung chona Mission support a din Lha khatna Rs. 10.000/ peh din ahung kipedoh uvin Houbung vilna akineitan ahi.

Hiche toh kilhon in S. Lhangnom B/C leh T. Phaiacham Baptist Church KBC Gambih No. 12 Evangelist Jamthang Haokip leh Evangelist Lamthang Haolai hon vilna aneijin ahi. Pathen in Houbung mite Phat thei boh jing tao hen

9. Amranjan Mission Centre a dia Guiter kicho doh ta.

Nisim 23-26 March Sunga KBC Gambih 18 Karbi-anglong Khuding mun'a Pate camp akineitoh kilhonin Amranjan Mission Centre Fellowship a din Guiter khat skichodoh in Rev Tongmang Haokip Secretary Men Depth. KBC Pathen minin Khan doh na aneitan ahi.

Tuchung Mission Report achom lama kahin peh thei jeh in Pathen kathangvah e. Pathen in KBC Mission natoh vang boh jing taohen.

CENTRE CHURCH CHASSAD, KBC GAMBIAH NO. 17 BIBLE CAMP



Date : March 26-29, 2021

Theme : "Thutah thu chu jangkei chan mang chan." 2 Timothy 2:15

SPEAKERS:

1. REV. ONKHO HAOKIP, COORDINATOR, HOLISTIC DEVELOPMENT, KBC

2. PASTOR JAMTHIENLAL HAOKIP, LECTURER, SHALOM THEOLOGICAL SEMINARY, KBC

Men Column

Rev. Tongmang Haokip

Convention Pate machalnale nakitongdohho achomlamtah a report boltheija kaumjehin Pathen kathang vahe.

(1) Lom Resource Centre (LRC):--Lom Resource Centre munna tunichan geijin na akitongjing jengin Wash Room khat anakisa jong Pathen lungsetna jalin akisachai jin Dt 10th March 2021 nin Men work Committee chengle Rev.Thangsei Haokip Secretary Literature KBC jaonale amun a cheng Chawkidar le Mistryho jaonan Rev.Tongmang Haokip Secretary Men Dept. KBC in thensona aneitan ahi chule Wash room thenso ahitoh kilhon in Pu Paothong Haokip C/C Salem Sapormeina le Insung miten jong Pakai lenggam madingin (LRC) a ding Belsa 2 ni hintoh un aban in Pu Seikhohao Vaiphei, President Men Department in jong Bubel belsa khat, Mebel belsa khat chule kongtong khat achunguva kipathu ahungkiphonge pathen in amale Insungmite phatthei boh jing taken.

(2) ONE DAY SEMINAR :- Dt 21th March nin Gambih N0.3 Pate toh Gambih Centre Salem Saikul houbungmunna one day seminar anakibol in Resource person in Rev. Dr Paul Paolen Haokip le Rev Tongmang Haokip Secretary Men Dept. KBC ana panglhon in hiche seminar ahin, Pate Pathen lenggam natohnale insung mipate Lamkai hinahole Convention pate missionary sponsored khat a kipannaho jong akiseijin hiche seminar akibol toh kilhon in Pu Jangkohao Kipgen & Family C/C Church Salem Saikul in jong Convention Pate jong Missionary sponsored a apanna chungu amale insung mite jong pate Missionary sponsored nadingin lhakhatna Rs 1000(sangkhat) cheh 2021 sunga pangdingin ahung kipedohun amale insung mite Chunga kipa thu ahung kiphonge chule pathen lungsetna jalin lolhingtahin Seminar anakichai jin, chule Houbung miten Jong chale nehthei tuitahtahjong eigonpeh uvin Houbungho chungu jong kipathu sangtah in kahinphonge.

(3) Convention Pate Sponsored a Pate Camp:- Dt 23-27th March 2021 sungin Convention Men Dept. Sponsored na in Gambih N0.18 Assam Karbi Anglong Gambih Centre Khoding Baptist Church munna Pate Camp Rev. Lamkeng Lhouvum Secretary M/E KBC le Rev. Tongmang Haokip Secretary Men Dept. KBC Camp Speaker chule Pastor Letjakai Singsit Cam Director Gambih Pastor chule Artist Ng Lhingneichong Haokip chule Pu. Seikhohao Vaiphei President Men Dept. KBC chule Pu Onthang Haokip IC Co-Ordinator le Pu

Thangjalun Haokip Good Samaritan Foundation Secretary jaonan, Pate Camp ana kibol in hiche Camp sungahi tahsalam a khantouna dingin jong Pu Thangjalun Haokip le Pu Onthang Haokip Resource Person hina in jong Gamsung khantouna dingin Seminar jong akibolin, Pathen kithopina jalin lolhing tahin Camp anakichai jin Gamsung Pate Lhagao lama ngoisateho, lhagao lama kipale thanom taha inlamma akile theijehuvin Pathen kathang vahe. Tahsalam damlouho:- Pate Camp kibolnahin Lhagao lam Camp keoseh hilouvin tahsamma damlouho jong damna dingin jong Pu Dr Thangchon Singsit jong a kipuinin Dr pu jong pakai min in ngailutna neitah in tahsa damlouho damna ngaichaiho jong jochan in jingkah nilhah ngailou in damlouho aven numei pasal agom in mi 259 avedoh in gamsung mite jong akipah theilheh jenguve chule Dr pule insung mite Chunga jong kipathu ahung kiphonge, chule Pate Camp lolhin na dinga sumple pai hintoh ho jouse chungchek a jong kipathu ahung kiphonge. Chuleh Pu James Gambih Chairman Gambih 18, in jong pate mission sponsored na ding in Lhakhat a Rs. 200/- peding in kitepna ahin neijin achunga kipathu akiseije.

1. Pu Palak Singson & Family Rs 10000 2. Pu Tongkholun Haokip & Family Rs 10000 3. Pu Seithang Doungel & Family Rs 6000 4. Pu D.Jangsei Haokip & Family Rs 3500 5. Pu Papao Touthang & Family Rs 5000 6. Pu Dr Jamlal Haokip & Family Rs 10000 le Damdoi/Lou tamtah 7. Pu Letthang Haokip & Family Rs 5000 8. Pu Paolal Baite & Family Rs 10000 9. Pu M.Jangkholun Mate & Family Rs 5000 10. Pu HM.Thangpu & Family Rs 10000 11. Pu Hellam Chongloi Rs 20000. 11. Pu T.Paominlen Haokip & Family Rs 10000 12. Pu Nehkholun Haokip & Family Rs 10000 13. Pu Henngam Haokip & Family Rs 30000 14. Pu Lunsei Haokip & Family Rs 5000 15. Pu Hasei Misao & Family Rs 6000 16. Pu. Mangon Haokip & Family Rs 5000 17. Pu Seicha Chongloi & Family Rs 10000 18. Pu Thatkhogin Haokip & Family Rs 2000 19. Pu Letjamang Haokip & Family Rs 5000 20. Pu Letmang Mate & Family Rs 3000 in 21. Pu Dr James Touthang & Family Rs 10000 22. Pu Thangpao Haokip Rs 1000 23. Pu Doutinlen Haokip Rs 500 24. Pu Upa Demmang Haokip Rs 2000 in 25. Pu Paongam Haokip Rs 2000 26. Pu Manglun Khongsai Rs 2000 27. Pu Peter Ngamsei Haokip Rs 1000 28. Pu Nehjamang Haokip & Family Rs 2500 29. Pu Thangkhoem Haokip & Family Rs 10000 30. Pu Paothong Doungel & Family Rs 5000 31. pu Nohsei Haokip Rs 200 32. Pu Seikhohao Haokip Rs 100 33. Pu Hejang Kipgen Rs 500. 34. Pu Ngamsei Haokip Rs 200 35. Pu Dongkam Haokip. Rs 1000 36. Pu Onthang Haokip IC Co-Orditor Rs 10000. 37. Pu Thangjalun Haokip & Family Rs. 3000/-

Pate Camp lolhin nadinga Pakai min na pan hinlaho jouse chung chehuva kipana sangtah kahin phonge chule Pu Dr Jamal Haokiple Insungmite damdoi tamtahle sum jong ahintohun chule Pi Chinkim Kipgen chule Pu Helun Haokip C/C Salem Sapormeina Camp lolh-innading Damdoi/loule sum hintoh dohho jouse chung a kipana sangtah kahung kiphonge Pathen in a insung chehuva Phatthei bohsoh keitaohenhe. Kakipahe .

Achaina kipana Pate Camp lolhin nadinga jingkah nilhaha Anneh tuidon eisempehu Gamsung nutele nungah gollhangho chule Khosungmite jouse chung chehuva kipana sangtah kahin phonge pathen in achungchehuva phatthei bohjing taohen. Amen

SEHAO RELIEF



Vangset umtah in March 5, 2021 nikho in Sehao vangkho, KBC Gambih No. 13 a um Pu Lhunlet Khongsai in meiyin ana kalha in ahi. Hiche akahlahna achun thilkeu le ijakai jouse ana kalha tan ahi. Hicheho lah'a hetthei ding chun Thinglhang Chang tin 160, Kol gari (Kenbo 2) le nei-legou tamtah ana kavam hel in ahi.

Gambih Pastor, Rev. Letkholal Haokip le Gambih lamkaiho le Gambih sung'a ulenao tamtah in ana vil uvin, Convention injong March 12 (Fridat) nikho in ana kidellut in Convention min in Rs. 20,000/- only in ana kisetvet in ahi.

Relief Team : Rev. Lamkeng Lhouvum, Rev. Onkho Haokip le Rev. Seiboi Tuboi chule Pu Haothenlal Doungel anavaikon ahi. Lampi ahahsat behseh jeh chun lampia gari ase dentan, Gambih No.14 Pastor, Rev. Lamkhogin le lamkaiho hapanna jal in Old Songjang a Pu Ngampu in a Gypsy ahintohdoh in chule Pallel akon in Rev. Lettinlal Chongloi gari (Bolero) jong ahungki mang in Gari hintoh doh amani chung le boina chung a lamchomchom a pan lajouse chung a sangtah in kipa-thu ahung kiseijin, Pathen in maban a boina toh kithopi jing theiding in phatthei boh jing taohen.

Women Column

Ms. Tingneihing Kipgen

Secretary, Women Department

March 12, 2021 nia KBC pumpi Nute anngol taona iman u toh lhon in KBC Women Work Committee cheng jong Gambih No 14 Nuten temna eihin nei dung jui un Gamphajol Baptist Church a Gambih sunga Nute ho toh kipah leh thanom tah in Taokhom na leh Pathen thua kitilkhouna akinei jin anom lheh in Pathen thangvahna ipeuvin ahi.

March 19, 2021 nin KBC No 7 a Nuten anngol taona chu New Keithelmanbi mun a akimang khom in Gambih sunga nute mi 395 taokhom dingin ahungun hiche kal val in jong Gambih Pastor paleh executive ho chuleh gamsunga Haosa mi 6 jong ahung pang un taokhomna leh Pathen thu a kitilkhouna akinei jin ahi.

March 20-23, 2021 sung in KBC Nute tohgon na noiija Songjang Baptist Church, KBC No 6 mun na Songjang B. Church Nute toh kithokhom in Houbung sunga Chate Camp akibol in Chapang 150 vel in gun chu tah in pan alao vin ahi. Hiche camp a hin Evan. Chingboi Speaker in apang in, Resource Person in Rev Letminthang, Ms Ruby chuleh Pa Nehminthang apang un ahi. Chapang tamtah in lhagao lam leh tahsa lam a ga a sopi diu kinepna lentah akinei jin ahi. Hiche Camp hi tukum chapang Camp bol ding kigong lah a amasa pen ahi.

2021 KBC NNUTE NIKHO THUDOL A HETSAHNA:

TEMNA LEH HETSAHNA: Amasa pen in mun tin na um KBC Nute jouse ngailutna pum in tukum 2021 Nute nikho salam kahin peuve. Ningkum 2020 chun Vannoi losoh natna Corona jeh in deibang in Houbung jousen ina mangthei tapou vin ahi. Hijong leh tukum hi Pathen lungsetna jal a natna din mun ho ahung phat dom toh kilhon na Nute Nikho hi imanthei diu hinam tia kinepna pum a hitobang niloupi chung change thangkouna hung kinei ahi. Hijeh chun muntinna um Houbung miten lolhing tah leh kipah tah a mang cheh dinga taona pum a ina kigot pan tadiu deisah na leh temna kahin nei ahi.

NUTE NIKHO LAAPI: Tukum Nute Nikho Laapi hi Chate/Khanglaiten Nute manlutna geldoh pum a Pathen vahchoina a asah diuva hung kiseum ahi. Atrack a o nem leh a o sang in jong KBC Group whatsapp hoa Audio recording pum in ana kithot doh tan, chuleh a la solfa note ahileh hiche program toh ahung kithot tha in ahi. Anikho a kimanchah na ding Program alhang pikhat hung kitah lang hi Houbung hon ingaichat leh ideidung juija ikisem be thei ju ahi. KBC

Women Ministry a dinga Taona leh thilpeh phat ho jong phatah a iman cheh uva chuleh itokhom hou Gambih Nute lamkai ho khutna ipeh lut cheh diu vin hetsah ihuive.

Thupi: Sana pah jem jouse sanga hoijo Minu (Proverbs 31:10)
 Sana leh song man tam hi ajat jat aum in ahi. Sana hihen Songman-tam hijong leh kijepna dinga adeh a numei ho dinga dei dei um leh salut tah a kigel ahi. Sana leh songman tam ho hi aman atam in chuleh a sot chan na aman kal jing jeng man tam cheh cheh thil lu khat ahi. Hijeh chun aching jep hon a sum apai ju sana leh songmantam choh na in amang un goukholna pha tah in anei jun ahi. Tumasang lai chun leng ho dinga thilpeh achoi teng uleh Sana aman jiu ahi. Tulai jin jong ingailut khat chu thil lu peh ding iti teng u leh mi tam tah in sana ahilou leh song mantam hohi akiha man in ahi. Hitobanga manlu leh ngaisanga um Sana leh Song mantam sanga jong manlu jo chu minu pha ahi tin thuchih bu jih pan asehi giltah ahi.

Thuchih bu hi alhang pi a seiding in Solomon michingpan anasut ahi akiti. Ahin la mun khat khatna chun min chom chom jong akiminphah in ahi tekah nan bung 30 na Agur sut ahi akitin, bung 31 na Lemuel sut ahi akiti e. Ahijeng vang in loikhat in min chom-dang kimin phah jong leh Solomon jih ma ma ahi tiloi jong aum in ahi. Ajeh chu hiche min ho chu Solomon min lhem dan a seijong aum kitnin ahi. Ahoi hijong leh hiche ho chu ha khol gil da maijuhi te. I sei nom u chu Proverb 31 na kisei numei nu hi Lemuel lengpa anu ahin hiche nu hi Pathen ging minu chuleh achapan amanu a kon a thilpha tam tah ajil doh nu chu ahi. Hijeh a chu anu chung akipana leh apachatna thu nasatah a aseina ahi. Hiche athusei ho jouse jong anun anahilthem jeh a hitobang thugil hi aseidoh theija nupha, numantam dan kiseina Bible chang lah a asang loi ja pang ahi. Lemuel hi leng ahin, anu hi ching tah leh chakhokhah them tah hiding dan ahi. Hijeh a chu Sana leh song man tam jouse sanga man lu jo leh hoijo chu minu pha ahi ati ahi.

Sana pah jem jouse sanga hoijo leh Songman tam jouse sanga manlu jo minu hithei na ding in Pakai gin na leh ama jeng bou ngailutna a kibulphu angai jin ahi. Ajeh chu Pakai gin nahin chih na leh hetna apeh ahi (1:7; 9:10; 31:30). Pathen jal in tulai jin aji leh achate lhagao hinkho ding khohsah na jal a mitlhi longa taojing minu tamtah igamsunga muthei jin aum tan Pathen ithangvah un ahi. Inchen khosah na lam a jong insunga Minu ho hi alhang pi a natoh pon tho tah khut chim louva natong jing ahiuve. Jinkah atho a patna a ihmud gei ja atohdoh u hi aman peh ding hileh koi pouvin pejou

ponte. Nao vop na, chanei na, chate khoukhahna, aji achate neh leh don ding sempeh na, a sil achen diu suhtup peh na, in suhtheng leh hetup na, ijakai ja insunga angaikhoh jouse vet tup jing hi minu ho mopohna ahi. Hiche insung natoh jouse atoh pum un lou natoh na hihen lang, Office kaina na leh sum le pai hol naho a jong nasatah in pan alau vin ahi. Inchen sem na a hin numei ho pan na alen l'heh jeng in ahi. Numei hapan na lou insung chu achengdoh atam pon ahi kiti leh kiseival behseh ponte. Chuleh Minu um louna insung chu adap in athom hao vin anom thei pon ahi. Achate tahsa leh lhagaova phatecha hin khoukhah doh minu ho hi aman tam dan chu sum le pai sana dang ka a choh jou hoi hilou man lutah chu ahi. Ajeh chu Chapa pha chanu pha sem doh hin society leh Houbunga ding chuleh nampi a din adeh in Pakai ja ding in minu pha mipa pha semdoh na ahin, hiche na ding hin minu te panmun alen l'heh jeng in ahi. Hijeh a chu MINU PHA chu sana pah jem jouse sanga hoi jo a chuleh song mantam jouse sanga man lu jo ahi tia thuchih jih pan ana sut ahi. Tunin hitobanga manlu KBC nute jouse kaja nao leh kangailutna salam kahin peh toh lhon in, imalam jousea chate ding leh inneipu ho dinga man lutah leh mel hoi tah minu hijing dingin temna leh deisah na ka hin nei juvin ahi.

PROGRAM

VAIHOMDING	: Men Chairman
THANGVAHNA LA	: Hb. La No. 506
THANGVAHNA TAO	: Women Chairperson
SPECIAL NO	: Nute Ho
NEITOHKOM NA	: KBC Women Ministry a ding
NUTE TAOPEH NA LEH	
TOKHOM THENSO	: Pastor/ Head Deacon
LABUNG	: Khanglaite 2021 Nute nikho
Laapi	“Ngailut um chunnu”
BIBLE SIMPHONGNA	: Youth Chairman
MESSAGE	: H/ Deacon/ Pastor/ Guest Speaker
Mipi Taokhom achaiding	: Sunday School Superintendent

TAONA A GELDOH DING HO:

1. Nute ho jouse jal a Pathen thangvah na leh kipa thuseina nei ding
2. Houbung sung le gamsunga nu manlu apun be jing na dinga
3. KBC Women Secretary, President leh Work Committee ho jouse dinga
4. Gambih leh Houbunga Nute lamkai ho jouse dinga
5. KBC Nute tohgon ho lolhin thei na dinga

Youth Column

Rev. Lunkhosei Tuboi
Secretary Youth Department

Music:

Pakai jalla kinep pi umtah Gambih le Houbung ho jouse a lamkai ho ama sa pen in kaja nao toh thon salam kahin pe cheh uve.

Naheng uva kahin hetsah nom chu ahile, Kuki Baptist Convention kivaihom na dungjuija Music lam khan tou thei nading le machal thei nading'a Music lam'a kivaihom na ihin suh let u to kilhon in tua pat Houbung sung hihen, Gambih level le Convention level hijong le Music lam toh kisai ja Training nei ding aum leh KBC Office a Music Committee hetpih na a Programme ikigon tah diu vin hetsah nale ngeh na kahin neijun ahi. Chuleh Koitabong Music Training bol nom ium u jong le kihil dan leh chepi akibah thei nading a khutchoi bu jong eiho KBC in a sem bou kimang ding, training kibol hojong Convention hetpeh ahi thei nading a Music secretary toh kijah mat ji ding in tem na ahung kineije.

Chule Saisijang Assembly Resolution No. 8/GA-KBC/67/2020 Music Committee thu: Saisijang Assembly a kiseilha , Gambih cheh a Music Committee Form bolding kisei bang'a Gambih jouse a Music Committee ikisem cheh tah diu vin jong tem na kahin neijun ahi. Committee um ding dan ahile

1. Gambih Youth Chairman chu Music Chairman (by post) hiding,
2. Gambih Choir Director chu Music Director (by post) hiding chuleh
3. Gambih sung a Music them mi thum (3) member a akilhen diu kiti ahin,

Koi tabong Gambih level la Music Committee kisem doh lou lai aum jong le Khonung teng kivai hom naho, noh phah louva ima chal thei nadiu vin agan nathei pen na ihin kisem uva KBC Office lam ma hetsah na ihin neicheh diuvin jong tem na sang pen Pakai min in kahin neijin ahi.

Kakipha'e

Pakai lenggam ma natoh khom piu

Rev. Lunkhosei Tuboi
Music Secretary, KBC

STS Column

January – March, 2021 Chan a STS Dinmun

*Rev. Dr. Paokhohao Haokip,
Principal. STS*

Pathen lungset le mapuina jalin, KBC in Theological Education Ministry a Shalom Theological Seminary (STS) ibolu tuni chanin imachal jinguvin, hito lhon chun tukum 2021 March lha chan a machal naho inahet thei diuvin ahung kitah langin, maban a toh ding toh ban hoa jong taona le sum le paiya kitho khom a pan ilah jom jing theina diuvin, gangtah a toh ban toh jomding ho le ipan lah ding dan hou jong ahung kitah langin ahi. Anasim cheh utin, pan latei din Pakai minin gelkhohna nei tah in hung kigo cheh ute.

Faculty

Core faculty mi 5, contract mi 3, visiting faculty mi 5, agom a mi 13
Student :Pasal mi 15, numei mi 6, agom a mi 21, Staff Office assistant cum accountant 1, assistant librarian 1, care taker 1, agom a mi 3

Library

Tuchan hin library lekhabu koina Racks kum masa a anakicho doh sa 38 Racks a konin, Centre Church, Kangpokpi a kon a Pu Sekholen Kipgen, Custom Inspector in Racks 15 (Rs, one lac val man) donate ahinbol pumin agomin Racks 52 aumtan, lekhabu volume 10000 val akikoi lut tai. Pu Seikholen Kipgen chungu Pakai minin kipa thu sangtah in ahung kiphonge.

Office

Office a angaicha thil le lo anakilamdoh sa ho banjomin athah in Round Table Conference a dingin table sao 3 akkisdoh in, touna (chair hoitah tah) 8 akichodoh be e.

Lupna (bed)

Hostel a ding lupna (bed) 10 akisdoh be e.

Touna

Chapel Hall le class room a ding athah in plastic chair 50 akicho doh in, desk 10 akisem doh e.

Dining Hall

Dining Hall thah (50 by 30) khat akisadoh e.

Toh ban

New Academic Session (2021 Jun Iha) kah a Men's Hostel khat sah doh teiding, chule twineh hahsat jeh a goha (Well) khat laichai teiding akigonge. Pathen a itaonauva hinkop jingutin, toh doh teina din sum le pai toh thei chanin jong hintoh ute, tin Pakai minin taona le tepna sangtah ahung kineiye.

Affiliation

Senate of Serampore noiya Affiliation hatah a anakidel chu Comision/ Inspection hung diu ahitan, mutei din akikinemin, imuteina diuin taonan hinkop jingute.

Programme : Ahung lhung ding 4 – 28th May, 2021 sunga, Shalom Theological Seminary (STS), S. Lhangnom, Kangpokpi District mun a certificate of Theology (C. Th) Course first semester kibol ding ahitai. **Course Fee**

- Mess fee : Rs 2000/-
- Tuition fee : Rs. 2000/-
- Study materials : Rs. 1000/-
- Total : Rs. 5000/-

1. Apang ding jousen houbung Head Deacon/ Gambih Pastor het pehna lekha ahin kipoh cheh diu ahi.

2. Apang ding jousen janpon le thoupon, chule ama ngaichat thil (si le chen, labu, Bible, Note book, pen etc) ho ahin kipoh diu ahi.

3. Apang ding jousen ageipen a 2021 April Iha kichai kah a Mobile number kipeho a hi amin, houbung min le Gambih number ahin hetsah diu ahi. Principal No. -7005535033/ 9089593092(WhatsApp). Vice Principal No. 7005017150. Gambih Pastor pa a kon a jong kijah mat to thei ahi.

4. Pathen natohna dinga Pathen thu hetnomna nei, Thadou-Kuki paova lekha phatah a simthei le jih thei ho pangthei ahi. Atamna thei chan a hung pang din hung kigocheh ute.

First Semester Course

1. Introduction to Church History
2. Old Testament Survey
3. New Testament Survey
4. Mission and Evangelism
5. Baptist Polity and Theology
6. Church Organization and Administration

Second Semester Course

1. Bible Study Method

2. Worship and Preaching
3. Introduction to Pastoral Care and Counselling
4. Dogmatic Theology
5. Introduction to Christian Education
6. Leadership Skills and Development

STS Share

Anoia minchong houbung ho hi 16th March, 2021 chan a, 2021 STS share pedoh ho ahi.

Gambih No. 1 - Centre Chruc, New Lambulane; Centre Church, National Game Village (NGV).

Gambih No. 2 – Leplen, Semol, Samushong, Twinomjang.

Gambih No. 3 - Gampum, Saijang, Centre Church, Molkon Bazar.

Gambih No. 4. - C.Ch, Salem Sapormeina, Mongpijang, Kholep, Gelbung, Saitu, G. Songlung, Lhangjol.

Gambih No. 5. - Solam Keithelmanbi.

Gambih No. 6. - Nil

Gambih No. 7. - Nil

Gambih No. 8 - Centre Church, Neihsial Veng;; Centre Church, Tui-bong; T. Khonomphai, Centre Church, B. Vengnom; Centre Church, S. Kanan Veng; Centre Church, Haolai Khopi.

Gambih No. 9 - Nil.

Gambih No. 10 – Zalenphai, T. Lanchah.

Gambih No. 11 - Lungngil

Gambih No. 12. – Nil

Gambih No. 13. - Nil

Gambih No. 14. - Nil

Gambih No. 15 - H. Mongjang

Gambih No. 16. Old. Twisomjang

Gambih No. 17. Nil

Gambih No. 18. - Nil

Gambih No. 19 - Khokon

Gambih No. 20. - Nil

Gambih No. 21 - Ch. Molbem

Hichea panglou jouse chu apeloulai ho ahiuve. Apelou lai jousen aganna thei chan a ihin peh loi diuvin Pakai minin avelin temna le hetsahna ahung kinei kit e. Chule tokhompri gambih Pastor hon jong lungset tah a igambih houbung hou avel, vel a inahet-sah jiuva, khohsah tah a ihindon jing diuvin Pakai minin ikitemuve;

ajeh chu College a Senate Inspection Team ho hung kah a aganna thei chan a boldoh/ toh doh louva khoh tampi aumin, sum le pai lhahsam jeh in ahiding bang tah in akimachal thei tapon ahi. Hingel kho cheh-ute.

Tentative Programme

Second Semester Exam : 19 – 24th April, 2021

Graduation : 28th April

C. Th Program : 4 -28th May, 2021

Summer Break : May, 2021

New Academic Session : June, 2021

(Programme ho le tohgon dang, dangho hi phatah a akichelah theina dingin itaonauva hijui jingute).

Theological Scholarship

KBC in kumsim a D.D/ M.Div. a pat chunglam Theology sin Final Year hi ipeh jiu to kilhonin, tukum (2021) a ding achesa 5th March, 2021 ni chun anoia minchong ho hi mikhat a dangka 10000/- (Rupees ten thousand cheh anakipedoh in ahi.

M. Th Student ho

1. Lamkholal Hangshing, Khomunnom, Gb. No. 3 – FFRC
 2. Thangboilal Kipgen, C.Ch, Salem Saikul, Gb. No. 3 – ACA
 3. Nohlen Haokip, Khoken, Gb.. No. 7 – FFRC
 4. Rev. Dr. Letkholun Haokip, Haikot, Gb. No. 20 – AICS
 5. Boinu Mangte, Twinom, Gb. No. 9 – South Korea
- B.D Student ho
6. Letgougun Haokip, Lamkajang, Gb. No. 19 – MTC
 7. Thangmoiya Doungel, N. Chaljang, Gb. No. 19 – MTC
 8. Manggoulen Haokip, C.Ch, Chassad, Gb. No. 17 – MTC
 9. Thangminlen Haokip, C.Ch, Chavangphai, Gb. No. 15 – MTC
 10. Tongminlun Haokip, C.Ch, Langol, Gb. No. 1 – ECT

Amaho lah a MTC Student ho hin asumu-uva konin ahin dong khomuvin, STS tosotna in dangka 300 (Rupees three thousandt) ahintoh doh uvin, achunguva Pakai minin kipa thu sangtah ahung kiphonge.

Principal, STS

Holistic Development Column

*Rev. Onkho Haokip,
Director, Holistic Development Committee.*

Workshop in Association with EFICOR:

68th KBC General Assembly a phatsahna ana um bang in March 1-4, 2021 sung chun Catholic Retreat Centre, Mantripukhri -Imphal mun'ah KBC Holistic Development Committee tohgonna in EFICOR toh Integral Mission le Creation Care chung chang'a Worker mi 30 in Training/Short Course ana lolhing tah in ana neikhom uvin ahi.

Hiche kin achun Rev. Tonglet Haokip, President, KBC, Rev. Dr. Hawngam Haokip, Emiritus General Secretary, KBC, Rev. Dr. M. Thongkhosei Haokip, General Secretary, Rev. Lamkeng Lhouvum, Mission Secretary, Rev. Thongkholun Touthang, Finacne Secretary, Rev. Tongmang Haokip, Men Secretary, Rev. Lunkhosei Tuboi, Youth Secretary, Ms. Lhingboi Kipgen, Women Secretary, amaho cheng injong ana op cheh uvin thuseina, taona le tilkhouna kin jong ana lauin ahi.

Resoure Person in Mr. Green Thomas le Mr Thangmang Doungel, EFICOR anapang lhon in thil thah le thu mantam tamtah kihilna ana chelha in ahi. Pathen phatsah ahileh June le August teng jongleh hiche tobang kigon hi um jom jing nalai ding ahi.

Pathen phatsah ahileh June 6, 2021 (sunday) hi KBC Event Calendar dungjuiya Environment Sunday anahi ding ahin, Pulpit Exchange hung kibol ding ahin Gambih, Houbung le Pakai lhachaho kigosa dem'a ana um cheh ding in temna ahung kineiyu.

Blood Donation in Association with JNIMS:

68th KBC General Assembly a phatsahna ana um bang in March 24, 2021 nikho chun Centre Church Salem Saikul mun'ah KBC Holistic Develpment le Youth Department pankhomna le Blood Centre, JNIMS toh kiguijopna in Blood Donation Camp lolhing tah in ana kibol chai tan ahi.

Thisan peho (Blood Donor) ho T. Shirt (Blood Donor: Kuki Baptist Convention kitat) khat cheh ana kipe in ahi. Hiche T. Shirt hi khat a Rs. 250/- man ahin hiche Sponsor hinbolho chung'a kipa thu sangtah in ahung kiphong in ahi. Pathen jal'a akiphah phabepho chu:

1. Pi Lhingcha Haokip, New Lambulane (T. Shirt -40),
2. Pi Hatneilam Haokip, Chassad Avenue (T. Shirt - 10),
3. Pu Thangboilen Misao, Tibal Colony (T. Shirt -10),

4. Pu Thangminlal Lupheng , New Lambulane (T. Shirt -10),
5. Pu Jangkhohal Haokip, Sangaiprou (T. Shirt -10),
6. Pu Mangminthang Haokip, Chassad (T. Shirt -4),
7. Gl. Jangkhohal Kipgen, Tribal Colony (T. Shirt -10),
8. Pu Kamkhohal Misao, Tribal Colony (T. Shirt -2),
9. Pu Lunminthang Haokip, Kangpokpi (T. Shirt -2),
10. Dr. Hemminlal Haokip, Pallel (T. Shirt -2),
11. Dr. Seilenkap Haokip, Chassad (T. Shirt - 2),
12. Rev. Onkho Haokip, New Lambulane (T. Shirt -2).

Hiche chungchon in Pu Jangkhohal Kipgen, Secretary, Centre Church Salem Saikul in Thisan phaldohho Refreshment jouse (Apple, Banana, Water, etc) ahin podoh in Centre Church Salem Saikul injong anikhoa mipi an nehna jouse ahin podoh uvin chule mipi kititna ding le thisan kilahna ding mun le ijakai jouse kituptah le hoisel in ana boipi uvin Rev. Seiminlen Haokip, Church pastor le atohkhompiho chule houbung mite jouse chung'a jong kipa thu sangtah in ahung kiphong in ahi.



Hiche chungchon in Gambih No. 19 le Gambih No. 3 a Youth Chairman teni le amani pan hatna jal'a thisan hung peho le muntin le gam tin akon a thisan hung phaldohho jouse chung'a kipa thu seijoulou ahung kiphong in ahi. Ahideh in JNIMS te toh eihin guijop'u Pu Seiminthang Lupheng, Secretary, Centre Church KPI le Pu Lunminthang Haokip, Committee member, amani chung'a jong sangtah in kipa thu ahung kiphong in, ijakaiya panlaho jouse Pathen in ajatja in phatthei boh jom jing tauhen.

Pathen phatsah ahileh Thisan Pehdohna (Blood Donation Camp) hi amun amun (Kangpokpi, Sapormaina, Pallel, Churachandpur, Imphal etc.) a hung kibol jing ding ahin sopi ulenao thisan ngaichaho ding'a pan la ding'a kigotna ana neicheh ding in Pakai min in tem ihuive. Thisan kiphaldohho hi JNIMS/RIMS Blood Bank a kikoi ahin genthei hahsat nikhoa ding'a kikhekkhol ahi.

Office Diary

Date 19/03/2021 Nikhon KBC No. 13 gambih hopsung um Chehjang Methodist Church chu Kuki Baptist Convention toh tahsa le lhagao va kiloikhom pi ding in Rev. Dr. M.Thongkhosei Haokip, General Secretary in Pa Pathen le Chapa Pathen chule Lhagao Theng Pathen min in lah lut nale phondoh na chu anei tan ahi, chule Hiche kin gon na chun Rev. Tonglet Haokip, KBC President in tilkhon na le KBC kivaihom na ho jong aseijin, phat jouse khumkha na Rev. Lunkhosei Tuboi, Youth Secretary in aneijin lolhing tah in Programme chai ana hitai, hiche to kilhon na tuni kho a pat na Chehjang Baptist Church KBC No.13 kiti ding ahitai.

KBC Youth le Development kithokhom ma Blood Donation bolding kiti chu Pathen lungset nale mapui najallin, akhat vei chan na Blood Donation chu Date 24/03/2021 Nikhon KBC No. 3 le KBC Gambih No. 19 hopsung'ah ana kibol in, Khangdong kiphah doh mi 28 akon in thisan peh na chu ana um in, kiphah na hinnei Khangdong ho jouse chung'a Pakai min in kipa thu akiphong in, chule Pathen in jong phat-thei boh cheh taohen. Chujong le hiche nikho a mun ajang kiphah tah a hin toh doh le angaicha jouse eihin poh doh pih u KBC C/C Salem Saikul chung'a jong kipa thu sang tah in akiphong doh in ahi.

Pate Camp

Men Department toh gon nanoija Date 24/03/2021 akipat in KBC No. 18 ah Pate Camp chu lolhing tah in Rev. Lamkeng Lhouvum, Mission Secretary le Rev. Tongmang Haokip, Men Secretary Speaker hinan ana kibol lin ahi.

41 Ihin na Youth Foundation Day Solam Baptist Church, KBC No. 5



KBC No. 5 Kum 41 Ihin na Youth Foundation Day chu Nisim 22 March ni in Solam Baptist Church, KBC No. 5 mun na Rev. Lunkhosei Tuboi, Youth Secretary KBC hinan lolhing tah in ana kichai jin ahi

TAHSA LEH LHAGAO PUIHINGTHEI THUGOLHO

1. Lolhinna leh pachanna hi dcichat khat boldoh ahilou leh lamdoh chu ahi. Lolhinna leh pachanna hi vangphat ahilou leh tosoi jeh'a kineiiji ahipoi, amavang natoh hatjeh, pottho jeh, thoh hat leh nga-hat jeh'a kinei thei ding ahi.

2. Pathien in mihem akivah nathei ding boltheina (talent) afeh cheh ahi. Lolhin nadin hiche talent Chu kihetdoh masat angaije. Mi'a na copy ahilouleh nathang setpi'a ahileh nalolhina lhasam ding ahi. Nang ma'a kihetdoh go in. Eima ipi ihi kihetdoh hi lolhinna dinga kalbi masapen ahi.

3. Lekha i-simvang'a government natoh mutei teiding tina aumdeh poi. Lekha sim pum'a eima khut thiem natoh khat (vocational training) kihil ding, i-sim chaiteng leh tohjeng theina ding'a kiguotna thil pha ahi.

4. Tulai loubol hon modern technology mangcha'a lentah tah, nehding, johding alhing setna ahung kondoh theina ding'a large scale a bolding ahi. Expert ho kihilsah'a aleito kitohding muchi tuding ahi. Eima cham cham'a kibol aga sodoh vatding ahi.

5. phat manthiem teina dingin nikhat, hapta khat, lhakhat ahilou leh kumkhat na ding *time* kistem'a juiding ahi. Ahin hiche sang'a phajo chu ahileh lungtup leh tohguon neimasat hi ahi. Lungtup neilouva phat manthiem zong tohdoh thupi umthei lou ding ahi. Nalungtup ipiham?

6. Society semphat nading in eima leh eima insung kistemphat masat angaije. A memberho aphot teng society ama chamin hungpha tante. Individual member ho kistempha louvin society pumpi chu kistempha theilou ding ahi.

~ Courtesy: Kalbi 40

KUKI CHRISTIANTE LAH'A AMASAPENHO

- October 20-24, 1958 kum in Keithelmanbi Baptist Church KBC Assembly masapen ana kibol e.
- August 12, 1958 nikho in Imphal Christian Centre Church (tua MBC) mun a KBC Council masapen anakibol e.
- Rev Seikholet Singson chu KBC Ordination Committee Chairman masapen in ana kilhengdoh e.
- Evan. Kaingul Chongloi chu KBC Sunga Nepali Project a Evangelist kisolmasapen anahi.
- Evan. Dharmo Singh chu KBC in Plain (Phaicham) Evangelist a ana kisol masa pen ahi.
- Pu HawIngam Haokip, KBC Executive Secretary chu Editor masapen hina in KBC Thuso 1968 kum in anakiboldoh in ahi.
- Pu Lenkhosei Kipgen chun 1968-82 changei KBC Youth President masapen hina anapon ahi.
- 1973 kum in Pu S.N. Gangte chu KBC sung a Youth Full-time Secretary masapen in ana pang pan in ahi.
- Pi Hatkhoneng Haokip chu KBC Women Secretary masapen ahi.
- Pi Hatkhonem Haokip chun 1970 kum in KBC Women President masapen hina ana tuh in ahi.

~ Courtesy : KBC Thuchinbu



KUKI BAPTIST CONVENTION

Govt. regd. No. 2432 of 1978 under Society Regs. Act XX of 1960
 Co-Operating with COUNCIL through MBO

www.kbc.org.in
 kbcinfo@rediffmail.com
 mail@kbc.org.in

Ref. No.1/80/KBC/PAA/2021

30th March, 2021

ADVERTISEMENT

With reference to the 68th KBC General Assembly 2021 Resolution, No. 3/68/KBC-GA/2021 (1), it is hereby notified that Christian Education Board invites an application for the post of Lower Division Clerk (LDC) for Dr. Colvin Academy, Mairh. His/her pay scale will be Rs.7,000/- p.m. Willing candidates can send the application form from the office of Dr. Colvin Academy, Mairh and KBC Office. The last date for the submission of form will be 20th May 2021 with DPC on the 27th May 2021.

Qualifications:

1. Born again and committed Christian
2. Diploma on Computer Application/Typing Course
3. 25 years of age and above
4. Matriculate and above

(REV. DR. M. THONGKHUSEI HAOKIP)
 General Secretary
 Kuki Baptist Convention (I)

Copy to:

1. CEB Members
2. Headmaster, DCA
3. Concerned File
4. Office Order File

(REV. DR. M. THONGKHUSEI HAOKIP)
 General Secretary
 Kuki Baptist Convention (I)



Sehao Relief team ho New Sonjang HD to kimuto



Rev. Tingoulen thahlutna - Gambih 4 centre



Pastor Haopu Doungel.thah lutna - Zalenbung

Post Regd. MNP/81
Regd No. 18134/88



If undelivered, please return to
The Editor. KBC Thuso
KUKI BAPTIST CONVENTION
Opp. DM College, Imphal - 795 001
Contact: 9862633173

63 KBC FOUNDATION DAY